

**Xabier Pérez Igrexas, en calidade de Portavoz do Grupo Municipal do Bloque Nacionalista Galego (BNG) no Concello de Vigo, ao abeiro do establecido no Regulamento Orgánico do Pleno e da restante normativa aplicábel, eleva ao Pleno da Corporación para o seu debate a seguinte**

## **MOCIÓN**

*URXINDO MEDIDAS PARA DOTAR SUFICIENTEMENTE O SERVIZO DE BOMBEIROS E GARANTIR A SEGURIDADE DA CIDADE*

### EXPOSICIÓN DE MOTIVOS

O servizo de bombeiros do Concello de Vigo ten un carácter esencial e mesmamente vital para a seguridade da cidade. No entanto, o mesmo padece desde hai máis de seis anos unha manifesta insuficiencia de medios, nomeadamente de persoal, que limita a súa capacidade operativa e provoca riscos innecesarios tanto para a cidadanía como para os profesionais do servizo.

A falla de persoal provoca que en practicamente ningunha xornada se cumpra a dotación mínima de 20 bombeiros, fixada polo propio Goberno municipal, téndose producido situacións nas que o número de efectivos operativos nunha xornada non superou a ducia. A falla de efectivos ten unha incidencia directa e grave tanto na organización dos operativos que puideren ter que desenvolverse para a atención de situacións de emerxencia. E tamén

acaba por ser a causa dos recorrentes feches do parque de bombeiros de Coruxo, o que supón desprotexer a metade do termo municipal e incrementar perigosamente os tempos de resposta, sen garantir que cada unha das dúas zonas dispoña no mínimo dunha autoescada e dun vehículo nodriza operativos.

Foron tamén numerosas as situacións nas que a insuficiente dotación do servizo limitou a súa capacidade de resposta. Así quedou de manifesto na atención ao incendio producido, en setembro do pasado ano 2023, nas instalacións do Punto Limpo, no que só estaban activos 15 bombeiros, por debaixo do mínimo de 20.

En conclusión, a insuficiencia de persoal acaba por se traducir nun aumento dos riscos, na desprotección dunha parte importante da cidade e tamén en límites na capacidade operativa que no caso de se producir dúas situacións de emerxencia simultaneamente ficaría desbordada. Nestas condicións non pode garantirse debidamente tampouco a seguridade de grandes eventos, como é o caso do Marisquiño, as fogueiras de San Xoán, ou a festa da Reconquista, tal e como teñen advertido reiteradamente as organizacións sindicais.

Esta situación estrutural verase agravada durante o período estival, no que a pesar de ser o de maior risco de incendios, a falla de persoal e o desfrute dos períodos vacacionais deixará o servizo por debaixo dos mínimos necesarios para atender as necesidades dunha cidade de 110 quilómetros cadrados, con núcleos poboacionais moi dispersos e con case 300 mil habitantes.

A pesar das reclamacións reiteradas por parte do persoal do servizo de bombeiros e dos sindicatos, que mesmo provocaron a convocatoria de folga indefinida, o actual Goberno municipal teima en non atender as súas xustas reivindicacións cunha falla de actuación que ameaza con cronificar e agravar o problema.

Neste sentido, a convocatoria de 40 prazas de bombeiros, anunciada recentemente, é unha medida propagandística e radicalmente insuficiente,

toda vez 23 desas prazas xa están desempeñando con interinaxes e que tendo en conta os futuros ascensos a mandos de 5 bombeiros e as 17 xubilacións que se van producir a final de ano, o saldo neto será que o servizo disporá de 5 efectivos menos. Non só non hai reforzo efectivo, senón que a situación empeorará.

Polo que, a través desta moción, o Bloque Nacionalista Galego propón ao Pleno a adopción do seguinte

ACORDO:

Urxir o Goberno municipal a adoptar coa maior celeridade, co acordo da representación sindical, as medidas que foren precisas para dotar co persoal necesario o servizo de bombeiros da cidade, mellorar o seu funcionamento organizativo, garantir que en todas as xornadas se cumpra o mínimo de efectivos en activo e o normal funcionamento dos dous parques, así como o respecto estrito aos dereitos laborais do persoal do servizo.

Vigo, Galiza, 17 de xuño de 2024.

Asdo.



SR. ALCALDE-PRESIDENTE

**CONCELLO DE VIGO**